

北 1991 1402

近代中國史料叢刊第三十五輯  
沈雲龍主編

啖蔗軒自訂年譜

方士淦著

文海出版社印行

夙

誼

可臨五世皇太后  
物方內淮神醫

啖蔗軒自訂年譜

定遠方士淦蓮舫

乾隆五十一年丁未六月十一日巳時余生時有

兄方周晬前一月殤至是先妣宣太恭人勞

瘁無乳伯父步瀛公命庶伯母潘太孺人

代哺以待乳媪予生而多病兩歲脅下以積成

痞醫藥不濟幾憊矣張媪者善鍼術適陳祖

姑母命爲予治再鍼而愈

戊申二歲歸武大妹生庶妣徐太孺人出太

孺人甲辰年來歸辛亥年歿

己酉三歲二妹生 宣太恭人出

庚戌四歲

辛亥五歲三妹生 宣太恭人出

壬子六歲正月二十五日 宣太恭人見背 太

恭人籍隸含山縣 外大父觀察晉山公 世濤

外大母庸太恭人之次女隨任滇南乾隆乙巳

來歸端莊慈儉得 大母陳太恭人歡 伯祖

耐齋公及同堂諸伯叔咸稱其賢因產三妹彌

月感寒疾醫家誤投涼劑倉卒棄世春秋三十  
有四劬勞罔極永慕曷勝是年超亭閔先生

步

青課讀時 伯祖餘齋公致仕家居花晨月夕

杖履追隨冬 繼妣徐太恭人來歸

癸丑七歲

甲寅八歲讀爾雅至梁山晉望也請於 先大夫

曰成王封叔虞爲唐侯至于燮乃改國號曰晉

爾雅先儒以爲周公作周公時安得稱晉耶

先大夫頷之

乙卯九歲 庶妣龐太孺人來歸

嘉慶元年丙辰十歲

丁巳十一歲二弟鍾彥生 徐太恭人出

戊午十一歲

己未十三歲予自壬子從超亭師經籍古文皆成

誦八年如一日焉

庚申十四歲受業懷遠楊馥亭先生 新蘭 先生精

子平爲余推休咎無不奇驗是年歸林四妹生

龐太孺人出

辛酉十五歲業師含山王石屏先生 勤垣 教詩賦

楷法冬 宣太恭人附葬邱家岡 先大夫墓

側邱岡地勢紆秀枕山帶湖乾隆丁酉 伯祖

耐齋公爲 大父卜吉於茲並諭 先大夫墓

左有餘地汝夫婦異日可同穴耐焉屆期定兩

穴界先開外穴土性埴而色晦已成井矣 先

大夫奉 伯祖之命唯謹且恐再啟之再如前

也 二伯父晴巖公力持不可乃開裏穴去浮

土卽獲舊磚半片蓋古人潛記也以下堅細油



潤五色斑斕是役也微 二伯父決策幾誤諸

公送葬者咸歎 耐齋公友于慈愛精鑒如神

益徵 宣太恭人福德之兆

壬戌十六歲應縣試歸黃五妹生 徐太恭人出

癸亥十七歲入縣學學使爲協揆山陽汪文端夫

子廷珍 九月 大母六十壽三弟士鼐生 龐

太孺人出四弟士銜生 徐太恭人出

甲子十八歲南關鄉試是年三月二三兩妹相繼

病殤五弟生 龐太孺人出

乙丑十九歲 大母節孝坊告成率子孫望

闕叩頭予先世家於休甯 五世祖公衍公

國初以布衣遷居鑑橋時兵燹之餘行篋中書劍自

隨 高祖兼山公績學篤行始入定遠籍 曾

祖厚齋公邑庠生敦品誼稱長者皆以 伯祖

餘齋公貴贈如公官 大父太學生龍坡公乾

隆戊子棄養 大母苦節三十餘年仰荷

旌褒悲喜交集三月予自六安迎娶楊恭人來歸是年從

學劉南溪先生 崧秀 與 十六叔父采卿公晉

三從兄 錫誥 先生之孫以興大令 嘉嗣 講習於

老瑩之側厥後科第相繼至今以為美談

丙寅二十歲補增生五弟殤

丁卯二十一歲雲間陳水伊先生 精書 設教淮南

晉三兄許劍星 宏鉅 暨子咸請業九月科場報

罷明年

仁廟巡幸淀津有

召試之典嘉平朔束裝歲除前日到京隨 二伯父寓是

年歸林六妹生 徐太恭人出歸楊七妹生

龐太孺人出

戊辰二十二歲師事鮑覺生先生

桂星學詞賦肆

楷法三月赴淀津直隸總督太谷溫景僑夫子

承惠學政少宰東武劉信芳夫子鑲之會考帶

領直隸暨各直省士子七十三人河干接

駕進獻詩冊

皇上御安福艦閱視長隄駐蹕

柳墅春皋雨霽

宮樹煙和雲日就瞻

天顏喜悅學政齊集士子恭應

召試定親王綿恩貝子丹巴多爾濟帶領侍衛八人奉

命監場

欽取一等第五名賞給舉人一體會試讀卷大臣為相國

大庾戴文端夫子 衛亨 協揆長白煦齋夫子 英

和少司馬如皋戴紫垣夫子 聯奎 倉場侍郎睢

州蔣元亭夫子 子蒲 先是進呈試卷二十二本

子名第八

御覽將五名內摘黜二卷遂第六復蒙

皇上拔置第五誠異數也 伯祖餘齋公爲中書翰林前

輩戴文端夫子眷念舊交向予垂問少宰劉信

芳夫子有二十人中最少年之譽翌日隨制軍

學使前詣道旁碰頭謝

恩旋京 二伯父云乾隆甲辰

高廟六巡江浙 叔祖珠泉公恭應

召試名列二等今汝擢巍科誦芬詠烈未可限也其努力

以副予望

己巳二十三歲會試後南歸六弟鍾元生 徐太

恭人出

庚午二十四歲八月中暍病滯下幾殆 叔祖珠

泉公屬許君崑山用大黃藥得下乃瘳

辛未二十五歲正月應禮闈迂道過曲阜謁至聖

廟林仰聖容撫碑碣遙瞻泰岱北峙巖巖二月

抵京仍隨 一伯父寓及試薦而不售房師編

修漢陽劉雲浦先生 彬士 七月 二伯父謝世

十四叔父恬菴公與予爲晉三兄襄理大事

一伯父自乾隆庚子侍 伯祖餘齋公於京師

既而服官先後卅年諄諄勗昆季子姓讀書立  
品承先啟後嗚呼不忘秋援例得內閣中書到  
閣行走七弟生 龐太孺人出

壬申二十六歲春楊恭人率側室王孺人來京夏

晉三兄扶 一伯父靈輿附糧艘南下子與余

秋涓 鴻祖 孝廉送至潞河

癸酉二十七歲充本衙門撰文 方畧館分校九

月 大母七十壽是年八弟鍾琇生 徐太恭

人出



甲戌二十八歲會試復薦而不中房師編修江西

謝向亭先生 階樹 四月初二日 大母棄養予

仰承重慈鞠育顧復未嘗一日遠離惟以兩次

北上離膝下者再 大母不言而神傷聞病中

猶呼予名不置讀李令伯陳情表能不痛哉七

弟殤

乙亥二十九歲大兒濬頤生側室王孺人出冬

大母合葬於邱家岡同年汪孟慈 喜荀 以尊甫

容甫年伯 中 所藏定武蘭亭五字未損本見示

真希世之寶也

丙子三十歲協辦侍讀補中書實缺引

見捐請

勅封父母封典如例歸凌八妹生 龐太孺人出

丁丑三十一歲會試薦而不中房師陽湖呂仲音

先生 子班

戊寅三十二歲正月選授湖北德安府同知因上

年復校

高廟實錄紅綾本優敘也二月引

見四月偕眷出都臨行見汪文端師諭云顧自己處分不

顧地方公事外官陋習也當腳踏實地做去又

云曹儷笙相國在朝房每贊爾差事好勉旃歸

里省親假滿赴楚謁從母舅漢陽司馬宣香坡

公葆光是秋布政使訥公訥福派充湖北鄉試

內簾監試官十月側室王孺人病歿二弟來慰

予於鄂

己卯三十三歲總督慶公慶保巡撫張公映漢委

審辦白蓮教案又赴襄鄖一帶拏獲習天主教

三十餘人八月初五日回省督撫合詞保奏併  
案送部引

見以示獎勵得

旨允準旋隨撫軍入闈幫辦提調監試事宜九月署布政

使章公廷樑委解鹽課銀兩赴東河交納冬請

咨赴部殘臘大雪寓裕州遊漢世祖祠祠中有

井名扳倒井光武故蹟也

萬壽

覃恩

誥封父母

賜贈祖考妣封典如例

庚辰三十四歲二月初至京十四日引

見奉

旨著先換四品頂戴交軍機處記名五月初九日奉

旨補授浙江湖州府知府初十日具摺謝

恩請

訓

召對乾清宮詢審案獲犯辦理各情節暨出身籍貫年紀

諭湖州錢漕最重浙西要缺好生去做碰頭謝

恩假旋修墓是年正月下旬過保定謁制府家來青公受

疇

公戊辰年任方伯津門之役予曾一見於行

幄及佐郡楚中書問常垂引延益厚六月朔出

都公派武弁送至德州月杪抵家七月偕晉三

兄省 二伯父之墓於池河遂東下前兩廣制

軍常熟吳公熊光退居姑蘇予造門爲請公備

述 先外大父宦雲南時緬甸用兵通省糜爛

外大父以郡守左右帷幄頓使炎徼投誠上紓

明倫彙編 家範典 卷一百一十五  
一  
宵旰追歎久之公中乾隆壬辰中正榜值機務曾隨鉅公  
某至滇與 外大父訂交焉香坡舅氏吳人八  
十歸田尙健在八月抵省恭逢

仁宗睿皇帝龍馭上賓隨班哭臨接印赴任會率僚屬成  
禮九月 十一叔父瑞廷公以福州郡丞引疾  
旋里迂道書溪談讌數日冬二弟送楊恭人挈  
大兒至湖州署歸安地棍陸名揚抗糧不法訪  
拏竄逸請委員督辦疊奉

覃恩

誥封父母

馳贈祖考妣並請本身妻室封典如例

道光元年辛巳三十五歲正月右髀病疽危甚少

司寇吳門宋悅研先生銛薦休甯胡君春圃秉

鈞診治忽一夕夢大母來榻上命予翻身用

力推助醒而面果向陽自是霍然矣先大夫

命二弟前來與晉三兄參酌調護是時陸名揚

就揜伏法八月寓會垣吳山片石居石堰塲離

尹從伯父葦川公膺薦來省侍遊西湖十二



月覺生先生杭城掃墓予以舟迓至苕川臨別  
贈詩有不信戴安道能迎王子猷句以誌寵修

碧浪湖浮玉塔

壬午三十六歲秋長興四安鎮旱災請緩徵重修

右文館拓東西號舍基址數文學使少宰杜石

樵先生堦顏其軒曰聞喜余亦製楹帖以紀事

蓋安定先生講學之所十二月先大夫六十

壽三弟入縣學閱峙亭中丞鶚元出其家藏明

莊毅公珪天順甲申十同年圖卷見示遺像清

高令人仰止

癸未三十七歲郡大水烏程歸安長興德清武康

五邑皆成澤國七月初二日夜大雨如注太湖

水聲震天土人云此湖翻也聞是夕嘉興府屬

之乍浦海嘯亦然實為奇災撫軍黃梅帥公承

瀛奏請全賑予勸各縣紳富捐輸添辦民賑湖

郡災務向照分數辦理吏胥因緣為奸民不堪

命予痛懲痼弊破格祈恩力懇以全災奏報屢

飭屢請用是積迂方伯常公常德羽檄交馳幾

登白簡時張蘭渚先生

師誠

在籍慨然謂予曰

太守愛民吾鄉之福方伯格於成例恐干部詰  
耳曷擇每邑稍近山鄉者區分數以合例餘概  
十分可乎予勉從之乃解

甲申三十八歲春歲大熟修復長興縣太湖石塘

七十餘丈作記立碑商城大鴻臚周鑑堂姻丈

鉞

率芝生比部

祖植

由豫來浙道出湖州盤桓

二日

乙酉三十九歲因德清縣案巡撫程月川

合章

叅

奏革職軍台効力贖罪楊恭人攜側室宋氏暨  
大兒返里三弟四弟自金陵來三弟病瘡先歸  
四弟留杭是年建黃龍洞祠宇重刊洞志郡庫  
向貯前代潘羽士鐵牌懸之洞中祈雨神驗仙  
跡也中忽遺失乾隆丙午雷太守輪修愛山臺  
復得之仍藏庫祈禱如初雷曾撰序余亦屬文  
并鐫志中屬歸安孫柳君孝廉衍慶考定郡守  
題名碑記予自庚辰秋承乏於斯至是六年課  
士皆有程式又喜愛山講席得趙味辛懷玉茅

松坪潤之兩前輩巡撫左杏莊先生輔先後作

揚人文繼起八月解組都人士繪峴南祖帳圖  
柳君作記韻語連篇齊梅麓同年亦有句云半  
生仕宦皆陳迹萬里關山實壯遊莫遣秋風明  
鏡裏會看圓月大刀頭遊雲棲讀香光墨蹟

丙戌四十歲二月北行舟泊吳門宋悅研先生已  
返道山親詣奠醊胡春圃拉品第二泉四弟送  
至揚州黯然握別夜過桃源縣誤走湖路山東  
巡撫叅奏奉

旨挈交刑部治罪而予已先至兵部投到矣刑部奏請

改發新疆計在部凡一旬憶丙子在京遇蜀人

金孝廉某相于官止四品又劉瞽者推予命亦

官四品但及馬重逢行程將數萬里今皆驗矣

覺生先生三月十九日薨於邸病革時盼予不

至手緘餽贐屬家人勞問如生平予立雪程門

廿年誼篤山頽木壞恨未能哭諸寢也四月二

十五日發都城外天甯寺涇縣翟君守培從而

西王雨農太守錦雯時宰清苑爲言往年之案

礪堂相國涖直督任公暇每謂與子家有舊耳

予名信予有守甚堅讞成獲譴以拘泥聞王益

服公由真定而南瞻大佛重搨隋碑庚辰會到欲訪

梁大司馬第宅而習池風流已銷歇久矣自晉

厯秦過平涼周太守礪招遊崆峒予策馬陟山

背而上十里憩頭天門大寺挽鐵絙厯階以升

經問道宮訪元鶴洞又十里躡山頂窮荒大漠

高處不勝寒忽暴風雨留寺宿主人飲饌極豐

予題句有云瑤琪曲澗能通馬風雨懸巖自挾

龍絕頂直堪長劍倚下山依舊白雲封錦西至  
崆峒篆章七月至皋蘭見制軍楊忠武公遇春

定戍伊犁適回疆有警忠武奉總統師干之

命予隨行出關識楊誠村通侯芳唱和有詩移營至哈

密勉亭都護恆敬過從尤勤初予備官薇省每

際木蘭秋獮威勤侯宜軒公相勒保留守予趨

直之下曾叨獎掖長君龔侯英惠好客有平原

之日子過烏魯木齊侯任都護款予十日日南

至抵戍下榻於領隊大臣今升陝督子謙制府



布彥泰

署中制府久歷邊陲老成練達與予爲

忘年交西北長城之寄予於哈密道中覲面早

卜之矣次兒濬孚生側室宋氏出

丁亥四十一歲揚威將軍文襄公相

長齡

丙戌秋

伊犁登程建大營於阿克蘇函屬署將軍

德英

阿以予奏辦漢字事件七月因四城克復奏請

鼓勵文武各員予蒙

恩免罪釋回伊犁地處極邊控馭南北師興以來軍儲

將罄余先請署將軍奏準大營停運以實後路